

Seminar legasi Tun Razak kenal pasti cara jayakan DEB

UM - 13/6/2007.

KUALA LUMPUR 12 Jun - Segala kelemahan dan kegagalan yang wujud dalam legasi pentadbiran Perdana Menteri kedua Allahyarham Tun Abdul Razak Hussein akan dikenal pasti bagi memastikan ia berjaya dilaksanakan oleh generasi muda masa kini.

Naib Ketua Pergerakan Pemuda UMNO, Khairy Jamaluddin berkata, antara legasi yang masih belum dicapai ialah Dasar Ekonomi Baru (DEB) di mana sehingga kini sasaran dasar tersebut masih gagal dijayakan sepenuhnya.

Katanya "Seminar Legasi Tun Abdul Razak Kepada Pembangunan Negara" akan mengenal pasti kelemahan tersebut dan seterusnya merumuskan cara serta kaedah yang paling efektif untuk mencapai dasar tersebut yang diperkenalkan oleh Allahyarham pada era 70-an.

"Allahyarham pada masa itu dengan wawasan yang cukup jauh telah melihat kepada satu matlamat yang kita tak dapat capai dan kita nak melihat (dalam seminar ini) sebagai generasi muda bagaimana kita boleh menyumbang untuk menjayakan wawasan beliau itu," katanya semasa ditemuramah dalam rancangan Selamat Pagi Malaysia di Angkasapuri di sini hari ini.

Seminar tersebut akan diadakan pada 15 hingga 16 Jun ini di Pusat Konvesyen Sime Darby di sini.

- Bernama